

շեշտելով, վանահայրը արտայայտեց իր միաբանութեան բարձր առանձնա-
յատկութիւնները՝ ասելով.

— Ձմեռոյ ամենասաստիկ ցրտերի ժամանակ անգամ դրանք վառե-
լու սովորութիւն չունեն, իսկ դրանց անկողիները իրանց զգեստն է լինում:
Իմ օրերում դրանք աւելի սովորեցին «գետնախշտի» կեանքին:

Վերջին խօսքերի մէջ նշմարւում էր վանահօր անմեղ պարծենկոտու-
թիւնը, որ բխում էր նրա վերին աստիճանի խստակեցութեան զգացմուն-
քից:

— Նրանք չէ՞ն հիւանդանում, — հարցրեց Ասլանը:

— Խիստ հազիւ է պատահում, որ իմ միաբանները հիւանդանային կամ
հիւանդութիւնից մեռնէին: Մահը հասնում է նրանց այն ժամանակ, երբ
իրանք խնդրում են եւ երբ պատրաստ են նրան ընդունելու:

Բայց մենք խուցերից մէկի մէջ գտանք մի հիւանդ: Միայնակ, անխնամ
պառկած էր նա սառն յատակի վրայ եւ ծածկոել էր իր վերարկոյի մէջ, խորին
կերպով հառաչանքներ էր արձակում: Ասլանը առաջարկեց բժշկական օգ-
նութիւն մատուցանել: Բայց վանահայրը արգելեց՝ ասելով.

— Թող այդ տանջանքը ապաշխարութիւն լինի նրան...

Ի՞նչ յանցանք էր գործել, ինչո՞վ էր մեղաւոր ողորմելին, այդ մասին վա-
նահայրը ոչինչ չասաց:

Վանքի զանազան շինածքները տեսնելուց յետոյ մտանք ժամատու-
նը: Այստեղ, տաճարի աջակողմեան խորանում, պահւում էին հին ձեռագիր-
ները: Խորանը այնքան մութն էր, որ վանահայրը իսկոյն մոմ վառեց: Մի պա-
տուհանի մէջ, խառնաշփոթ կերպով միմեանց վրայ ածած, փոշու եւ բորբո-
սի թանձրութեան տակ ծածկոած գտանք մեր նախնեաց գրաւոր վաստակ-
ները: Այդ վայրենի անհոգութիւնը տեսնելով, Ասլանը այլեւս չկարողացաւ
ապել իր վրդովմունքը, ասաց.

— Ես չեմ կարծում, որ Լանգթեմուրը այսպէս անփոյթ կերպով վարոած
լինէր հայոց գրքերի հետ: Եթէ ճիշտ է աւանդութիւնը, թէ նա տարաւ հայոց
գրքերը, պետք է ճիշտ համարել եւ այն, որ Սամարկանդում մի առանձին աշ-
տարակ շինել տոնեց եւ նրա մէջ մեծ խնամքով էր պահում այդ գրքերը:

Ասլանի նկատողութիւնը ամենեւին չվիրաւորեց վանահօրը. նա բաւա-
կան սառնասրտութեամբ պատասխանեց.

— Անձրեւի եւ ձիւնի ժամանակ այնտեղից կաթում է, պարոն բժշկա-
պետ, — նա ձեռքով ցոյց տոնեց քայքայոած խորանի առաստաղը, — այդ խո-